



suatea

SINDICATU UNITARIU Y AUTÓNOMU DE TRABAYADORES DE LA ENSEÑANZA D'ASTURIES - C.I.F.: G33 027632

C/ Telesforo Cuevas 2, 1^U A dcha. - 33005 - Uviéu. Tfnu. 985 274 343. Fax. 985 236 464.

E-mail: suatea@suatea.org Web: www.suatea.org

COMUNICÁU PRENSA 8 SETIEMBRE 2009

Llegáu'l día 8 setiembre deberíemos festexar que les nuestres instituciones pasu ente pasu fueron construyendo'l país contribuyendo al so desarrollu socio-económicu y consolidando la so cultura propia; pero en bien poco o más bien en nada se collaboró nello dende l'ámbitu educativu.

A lo llargo'l cursu pasáu llogremos que la nuestra llingua entrare nos planes d'estudiu de la Universidá na facultá de Filoloxía y Maxisteriu, lo que permitirá que se siga formando'l profesoráu pa enseñar en tolos niveles educativos obligatorios. Sicasí, esti llogru ye parcial y escasu si tenemos en cuenta les reivindicaciones históriques de la so presencia na Universidá, pero supón el primer pasu d'una implantación más amplia nel currículu universitariu. Paradóxicamente, les titulaciones relacionaes cola nuestra llingua daes pola universidá son y sedrán papel moyao si nun se reconoz la especialidá de Llingua Asturiana y Gallego-Asturiano. Agora mesmo, el profesoráu con esta especialidá ye discrimináu llaboralmente en tolos ámbitos del sistema educativu, pues nun ye valorada n'igualdá coles otres sí reconocíes: minusvalórase nos baremos d'oposición, tórgase l'accesu a puestos de trabayu del ámbitu socio-lingüísticu en Secundaria, nun se convoquen oposiciones d'esta especialidá ... D'esta situación ye responsable'l Gobiernu asturianu.

Discriminación tamién sufre l'alumnáu de Primaria y Secundaria cuando pa poder recibir clases de la nuestra llingua tienen que constituir grupos con un númberu mínimu de persones. L'alumnáu d'Infantil nin siquiera se-y reconoz el derechu recibibles, pues el Currículu d'esta etapa nun recueye nengún conteníu de Llingua Asturiana o Gallego-Asturiano (SUATEA tien interpuestu un recursu contra él pendiente de resolver xudicialmente).

En viendo esta situación y aprovechando'l calter reivindicativu qu'ha de tener el día d'Asturies, dende **SUATEA**:

- Manifestamos la necesidá de que nel futuru Estatutu d'Autonomía d'Asturies se declare la **OFICIALIDÁ** de la Llingua Asturiana y el Gallego-asturianu nel so territoriu, como única ferramienta llegal que garantiza'l respetu efectivu de los derechos llingüísticos de tolos asturianos y asturianas, y favorez la sobrevivencia de la nuesa llingua y cultura.
- Desiximos que les places de Llingua Asturiana y Gallego-Asturiano pasen

a formar parte de les plantiyes orgániques de los centros, la creación de la especialidá y la convocatoria d'oposiciones.

- Desiximos que'l currículu d'Educación Infantil recueya la nuestra llingua y que demientres nun lo faga s'atiendan toles demandes d'escolarización nesta etapa fundamental pal deprendimientu en xeneral y el llingüísticu en particular.
- Pidimos que nos centros s'axeiten Planes Llingüísticos que dean un tratamientu integráu y coordináu de toles llingües que s'enseñen y onde la nuestra llingua seya vehicular en delles aries.
- Facemos un llamáu a la sociedá asturiana y a la Comunidá Educativa en particular pa que trabaye por estes reivindicaciones esti día, los vinientes y nos foros y organizaciones sociales que les defenden.